



Republika e Kosovës
Republika Kosovo / Republic of Kosovo
Kuvendi i Komunës Rahovec
Skupština Opštine Orahovac / Municipal Assembly of Rahovec



Nga mbledhja e rregullt e Kuvendit Komunal të Rahovecit, e mbajtur më **29.10.2024**, me fillim në orën **10:10**. Mbledhjen e kryesoi kryesuesi i Kuvendit, **Arbër Zenuni**. Në fillim kryesuesi konstatoi që kuorumi për mbajtjen e mbledhjes ekziston. Në fillim të mbledhjes, nga 31 anëtarë, të pranishëm kanë qenë 25.

Kryesuesi: Përshëndetje për të gjithë! I nderuari kryetar i Komunës, **Smajl Latifi**, nënkryetar **Fatmir Iska**, të nderuar anëtarë të Kuvendit Komunal, drejtorë të drejtorive komunale, zyrtarë komunalë, përfaqësues të KFOR-it, medie, të nderuar qytetarë të komunës së Rahovecit. Për këtë mbledhje të **dhjetë** me radhë të vitit 2024, së bashku me kryetarin, kemi vendosur për këtë rend dite:

REND DITE

1. Shqyrtimi dhe miratimi i procesverbalit nga mbledhja e kaluar;
2. Pyetjet, përgjigjet dhe diskutimet e kuvendarëve;
3. Shqyrtimi dhe miratimi i propozim-vendimit për miratimin e Planit Lokal për Mbrojtje nga Dhuna në Familje, 2024-2026;
4. Shqyrtimi dhe miratimi i propozim-vendimit për miratimin e Planit Lokal të Veprimit në Mjedis, 2024-2028;
5. Shqyrtimi i Raportit Financiar, janar-shtator 2024;
6. Shqyrtimi dhe miratimi i vendimit për dhënien në shfrytëzim afatgjatë të pronës së paluajtshme të komunës, P-00772-10, ZK- Xërxë;
7. Shqyrtimi dhe miratimi i propozim-vendimit për shpalljen me interes të përgjithshëm pjesën e parcelës 05537-2, ZK- Rahovec;
8. Shqyrtimi dhe miratimi i propozim-vendimit për themelimin e institucionit për edukim në fëmijërinë e hershme në Krushë të Madhe të Komunës së Rahovecit;
9. Shqyrtimi dhe miratimi i propozim-vendimit për themelimin e institucionit për edukim në fëmijërinë e hershme në Ratkoc të Komunës së Rahovecit;
10. Shqyrtimi dhe miratimi i propozim-vendimit për themelimin e institucionit për edukim në fëmijërinë e hershme në Xërxë të Komunës së Rahovecit;
11. Shqyrtimi i informatës nga DMSH-ja, lidhur me situatën e zjarreve gjatë sezonit të verës.

Shtesë:

12. Shqyrtimi dhe miratimi i propozim- vendimin për transferimin (harmonizimin) e mjeteve buxhetore 2024.

Kryesuesi: Të nderuar kuvendarë, fillimisht e kemi edhe një pikë shtesë të cilën do ta prezantojë drejtori i Financave, Afrim Limani.

Afrim Limani: Faleminderit, kryesues! I nderuari kryetar, nënkryetar, kolegë drejtorë, sot e kemi si pikë shtesë vendimin për transferimin dhe harmonizimin e mjeteve në kuadër të kategorisë: Paga dhe Shtesa për vitin 2024. Në vendim për transferim kërkohen 482.735.20€.

Kryesuesi: Faleminderit, drejtor! Atëherë, pikën shtesë e vendosim në votim. Kush është “për”?... Kundër?... Me shumicë unanime (20) aprovohet pika shtesë. Tani e vendosim në votim rendin e ditës si të tillë. Kush është “për”?... Konstatoj që unanimitasht (22) votohet rendi i ditës i paraparë për mbledhjen e dhjetë të Kuvendit Komunal.

1. Shqyrtimi dhe miratimi i procesverbalit nga mbledhja e kaluar:

Kryesuesi: A kemi ndonjë koment apo diskutim nga anëtarët e kuvendit rreth procesverbalit nga mbledhja e kaluar? Nëse jo, atëherë po e vendosim në votim! Kush është “për”?... Unanimitasht aprovohet pika e parë e rendit të ditës.

2. Pyetjet, përgjigjet dhe diskutimet e kuvendarëve:

Burim Krasniqi: Faleminderit, kryesues! Përshëndetje për ekzekutivin, kolegët asambleistë, monitoruesit, mediet! Pyetje të reja nuk kam, përpos asaj që dua t’i përsëris dy pyetje prej të cilave nuk kam marrë përgjigje. Një pyetje ka qenë para dy seancave, sa është vlera që komuna gjendet në procedurë gjyqësore-përmbartimore që pritet t’i merren komunës. Sa është vlera bazë dhe shpenzimet e tjera – kamata? Pyetja tjetër ka të bëjë me tri projektet që i ka evidentuar ZKA-ja, që kompanitë i kanë përfituar projektet përmes 20%-it të poenëve, si rezultat i planit dinamik. Pyetja ka qenë: Këto kompani a kanë qenë më të lirta? Apo 20%-shi u ka mundur që ta marrin projektin? Faleminderit, është pyetje e përsëritur e seancës së muajit gusht.

Ilir Pallqa: Faleminderit, kryesues! I nderuar kryetar, nënkryetar, drejtorë të drejtorive, kolegë asambleistë, të pranishëm në sallë! Kryetar, këtë muaj jeni takuar me Liburn Aliun për çështjen e zgjerimit të rrugës, Gjakovë – Rahovec – Prizren. Çështja analoge me autostradën e Dukagjinit dikur. Fillimisht, unë nuk kam besim te ju e as te Liburn Aliu në këtë valë 6-vjeçare. Kemi informata, por edhe në postimin tuaj në projektor, figuron varianti I final. Në atë plan të parë, para Urës së Fshajit, ndërrohet kahja e rrugës tërësisht. Rruga kryesore e Xërxës, që është në lidhje në mes të Prizrenit dhe të Gjakovës, si dhe vazhdimisht është në rritje me biznese afër rrugës, po izolohet. Me këtë izolim, komuna jonë izolohet në tërësi. Unë nuk e di me kë ka bërë pazare Liburn Aliu, veç e di që ai ka thënë që autostradë nuk ka, por vetëm zgjerim të rrugës aktuale. Po them me bindje të plotë që çdo ndryshim i kahës së rrugës aktuale për zgjerim, është akt pabesie ndaj të gjithë banorëve të Rahovecit dhe izolim i pashembullt i një komune të Kosovës. Kryetar, ju jeni pjesë e këtij diskutimi dhe do të jeni përgjegjës nëse kjo ndodh në Rahovec. Mos të harrojmë, në krejt këto vite, në 70% të territorit është shpërfillur në tërësi Rahoveci. Neve si potencial biznesor dhe jo vetëm, na ka mbetur Xërxa, e cila shërben si vend tranzit për këto komuna. Po e shtroj këtë çështje në kuvend që të marrim sqarime prej kryetarit dhe të diskutojmë për ndalimin e negociatave të dikujt atje lart, apo të dikujt këtu poshtë, në kurriz të Rahovecit.

Sejfullah Sejfullahu: Faleminderit, kryesues! Përshëndetje kryetar, nënkryetar, drejtorë, vëzhgues! Kur e kemi votuar në fillim planin e punës së Kuvendit, e kemi përmendur edhe një vizitë studimore, para verës. Si është puna e kësaj dhe kur është caktuar data? Pyetja e dytë është për kryetarin: Kryetar, në një konferencë për medie e kam përcjellë Vlora Spacën dhe është ankuar në moszbatimin e rekomandimeve nga komunat përkatëse. Herën e kaluar, nënkryetari më ka informuar që në krahasim me komunat e tjera, qëllojmë më mirë në këtë aspekt. Më intereson të di se ku jemi tani me zbatimin e rekomandimeve? Pyetja tjetër ka të bëjë me kanalizimin e Krushës së Madhe. Sot kemi qenë në terren dhe gjendja është shumë keq. Si zakonisht, topi do të hidhet te “Radoniqi”, sepse ne i paguajmë ata. Kryetar, thirrni në telefon dhe krijoje një zgjidhje, sepse gjendja nuk është e mirë, bile besoj që sot është shumë vonë.

Lirigzon Kastrati: Faleminderit, kryesues! Të nderuar anëtarë të ekzekutivit, kolegë anëtarë të kuvendit, përfaqësues të KFOR-it, qytetarë të Komunës së Rahovecit. Fillimisht, dua ta ngre një shqetësim të bujqve tanë, ka të bëjë me subvencionet në bujqësi, e di që është në kompetencë të ministrisë, por, si komunë a keni ndonjë informacion? Për Drejtorinë e Arsimit i kam dy pyetje: Sot, anëtarëve të Kuvendit do t’u paraqiten tri vendime për themelimin e tri

çerdheve, dëshiroj të di se a keni buxhet të mjaftueshëm për funksionalizimin e këtyre çerdheve, sepse në buxhetin e vitit 2024 nuk figuron. Tjetra, a janë furnizuar të gjitha shkollat me material për ngrohje, me dru dhe me pelet dhe sa është vlera e kontratës së nënshkruar? Pyetja tjetër ka të bëjë rreth konkursit për drejtor të QKMF-së. Pse nuk ka pasur deri më tani drejtor QKMF-ja? Unë e kam parë statutin e QKMF-së për kriteret e konkursit dhe aty nuk e keni cekur që kandidati duhet t'i ketë 5 vjet përvojë pune si specialist i mjekësisë familjare dhe 3 vjet në fushën e menaxheriale.

Edonë Kryeziu: Përshëndetje për të gjithë të pranishmit! Sot jemi këtu si përfaqësues të votuesve, të cilët presin përgjegjësi dhe zgjidhje. Është e domosdoshme që ne t'i adresojmë shqetësimet dhe problemet e komunitetit. Udhëkryqi i fshatit Xërxë është një rrezik i vazhdueshëm për banorët dhe ka vite që është kërkuar zgjidhje për ta përmirësuar sigurinë në atë vend. Qarkullimi i automjeteve dhe i autobusëve të mbushur me nxënës është shumë i madh, ndërsa masat e sigurisë janë minimale. E di që kjo është kompetencë e ministrisë, por si Komunë e Rahovecit mund të ndërmerri hapa të rëndësishme, nëse ka vullnet politik. Tani, në prag të zgjedhjeve, e keni një mundësi të shkëlqyer për të ndërhyrë, duke treguar vullnetin për të ndryshuar diçka që qytetarët e kërkojnë ndër vite. Banorët kanë nevojë për zgjidhje dhe jo për premtime të pambajtura. Çerdhet e ndërtuara së fundi, kanë një pasqyrë të trishtuar të infrastrukturës. Dua t'ju sjell në vëmendje situatën e çerdhes në Xërxë. Fotot tregojnë që radiatorët janë të dëmtuar, gjysma janë të vendosur në mur e gjysma në tokë. Në vendin ku rrinë, zhvillojnë aktivitete dhe flenë, raftet nuk janë të mbushura me lodra, por me këpucë. Kryetar, fëmijën tuaj a do ta lejonit të qëndrojë në një ambient të tillë? Për më tepër, në mungesë të lodrave dhe të materialeve bazë, prindërit janë të detyruar të kontribuojnë financiarisht për t'i plotësuar këto boshllëqe. Të gjitha këto që i fola, mund t'i vërtetoni në bazë të faqes zyrtare në facebook, ku janë të postuara të gjitha aktivitetet nga edukatorët. Kërkesa ime është e qartë, ju lus zyrtarisht t'i merrni me seriozitet këto shqetësime dhe të ndërhyni sa më shpejt që është e mundur.

Sinan Kryeziu: Faleminderit, kryesues! Përshëndetje për të gjithë të pranishmit në sallë! Për korrektësi, unë i kam dy vajza (binjake) që vijnë në atë çerdhe në Xërxë. E para e punës, unë nuk kam bërë pagesë prej që është hapur çerdhja. E dyta, fëmijët e mi nuk bëjnë gjumë asnjë ditë në çerdhe, sepse janë me orar të shkurtuar. Unë jam shumë i kënaqur me kushtet aty, bile sot i pashë punëtorët teknikë duke punuar në rregullimin e nxemjeve. E inkurajoj Drejtorinë për Arsim që të vazhdojë të punojë tutje.

Hasan Përboqi: Faleminderit, kryesues! Përshëndetje kryesues, kryetar, nënkryetar, kolegë asambleistë, drejtorë të drejtorive, medie, monitorues, qytetarë! Na duhet një informatë nga Drejtoria për Kulturë, Rini dhe Sport rreth përfundimit të punimeve tek Epopeja. Ku është gjendja në këtë fushë dhe a ka shpresa që shumë shpejt klubi t'i zhvillojë ndeshjet aty. Përndryshe, përgëzime prej ish-drejtoreshën Bjondina Kleqka, tani drejtorin Afrim Dina dhe në krye me kryetarin Smajl Latifi! Ky projekt i ka pasur vështirësitë e veta, por në fund po del të jetë një projekt super i mirë. Shpresojmë që shumë shpejt do të shijohet nga ekipi i parë me lojërë vendas, gjithashtu edhe shkollat e futbollit që janë shumë aktive në qytet, si dhe publiku rahovecian që është dashamir i madh i futbollit.

Kryetari: I nderuari kryesues i Kuvendit, Arbër Zenuni, nënkryetar, drejtorë të drejtorive, anëtarë të kuvendit, përfaqësues të mediave, KFOR-it, OSBE-së dhe të gjithë ju që jeni të pranishëm! Katërmëdhjetë asambleistë nuk e kanë dorëzuar biografinë e tyre, gjë që institucionet nuk e dinë se kush janë ata dhe mendoj që është afati i fundit, sepse jemi në vitin e fundit të mandatit. Biografia duhet të publikohet në faqen ueb. Do t'u tregoj qytetarëve që jeni vonuar, 7 janë të Aleancës dhe 7 të partive të tjera. Është kërkesë e zyrës së Kuvendit dhe është mirë t'i dërgoni aty, apo te Blerta Gashi-Nalli. Kam dëshirë që Burim Krasniqit t'i përgjigjet Afrim Limani, për procedurat përmbartimore dhe vlerën e procedurave përmbartimore. Jemi të vetëdijshëm që të gjitha komunat janë në procedura përmbartimore dhe rasti më i freskët është Suhareka, të cilës dje iu kanë bllokuar xhirollogaritë. Nuk kemi çka fshehim, sepse të gjitha janë vendime gjyqësore, si dhe të gjitha këto informacione i kanë kërkuar edhe KDI-ja. Sa u përket procedurave të prokurimit, tani kemi rekomandim dhe insistim nga konsulentët e USAID-it i jepet përparësi kriterit, çmimi ekonomik më i favorshëm dhe nuk ka më vetëm çmimi më i lirë. Nuk është çudi që ndonjëherë nuk e fiton më i liri. Ata janë duke insistuar që edhe në institucionet qendrore të ndodhë një gjë e tillë. Zyrtari i prokurimit i di më mirë këto gjëra. E vërteta është që po të

isha ministër i Infrastrukturës do të ishte kryer autostrada dhe zgjerimi i rrugës. Janë bërë 5 vjet që nuk kanë bërë asgjë institucionet e nivelit qendror në drejtim të zgjerimit potencial të rrugës Rahovec-Gjakovë-Deçan-Pejë-Istog. Këtu jemi dëshmitarë që dikush e ka mbrojtur ministrin pa e njohur dhe unë e njoh shumë para të tjerëve. Tani jemi në një situatë ku e gjuajnë ministrinë sikur një leckë. Së voni është biseduar për zgjerimin potencial të rrugës Prizren-Krushë e Madhe-Xërxë-Gjakovë e tutje. Ministri, me ekipin e tij, ka ardhur dhe ne i kemi mirëpritur këto biseda, për variantet që ata i kanë. Disa shokë të atij që foli, kanë tentuar t'i bëjnë disa "pazare" pa ndonjë alternativë, m'i ka treguar ai. Ministri iu ka bërë të qartë, duke thënë që ne do të bisedojmë me kryetarin dhe me institucionet komunale dhe jo të bëjmë bisedime pa alternativë. Në fund të fundit, kush janë ata që t'i bëjnë presion ministrit. Sidoqoftë, ajo temë nuk është në interes të trajtohet në kuvend. Përndryshe, kam informata aq shumë sa që dikush mund të dalë edhe jashtë sallës së kuvendit. Pazare nuk bën Smajl Latifi dhe kurrë nuk ka bërë. Shokët tuaj i kanë bërë disa takime për disa shpronësime, për disa para dhe për disa interesa. Kjo punë është dashur të bëhet më herët, sepse tani unë nuk besoj që do të ketë zhvillime të shpejta dhe pozitive në zgjerim të rrugës. Problemi është që "pazare" kanë tentuar të bëjnë ata, që dikur kanë iniciuar dikur edhe peticion për interesa totalisht të ngushta. Zgjerimi i rrugës ka rreze, sidomos në pjesën e Xërxës. Argument themelor është që prej hekurudhës duhet të largohemi rreth 8m dhe në këtë mënyrë zona e bizneseve bllokohet. Këto janë parimet e prezantuara nga ekipi i ministrisë. Në debat kanë qenë edhe çështjet të tjera që e ndërlidhin opsionin e autostradës, qoftë zgjerimin. Mos të harrojmë, dy variantet janë të atyre. Unë kam kërkuar që të ketë gjithsesi rrugë për mjete bujqësore. A ndodh zgjerimi apo autostrada, kjo është punë e institucioneve qendrore. Zgjerimi ka shumë rrezik dhe kërcënon pronat, pasurinë dhe jetën e qytetarëve, sidomos në Xërxë dhe një pjesë të Krushës. Në bazë të bisedave, biseda ka qenë e hapur, sepse unë nuk shkoj në majë të Zatriqit atje, të fshihem diku prapa antenave. Biseda ka qenë në sallën e institucioneve. Nuk shpresoj që diçka do të ndodhë. Janë ndërprerë negociatat, sepse kanë ndodhur zhvillime të tjera në Ministrinë e Infrastrukturës dhe nuk ka më asgjë. Pas datës 9 shkurt flasim prapë, sepse para zgjedhjeve nuk pritet të ketë ndonjë zhvillim interesant sa të bëhet temë në kuvend. Sejfullah Sejfullahu bëri pyetje rreth ZKA-së: Raporti i ZKA-së zyrtar për vitin 2023 thotë që kemi progres në zbatimin e rekomandimeve. Ju e dini që i kemi pasur 9 rekomandime, 5 janë zbatuar, 4 plotësisht dhe një pjesërisht, 4 rekomandime kanë ngelur dhe 4 të tjera janë shtuar. Te organizimi i KDI-së, unë kam qenë panelist, bashkë me kryetarin e Kamenicës. Kontrata kolektive ne na ka penalizuar. Aty ia kam bërë një pyetje Ismet Kryeziut, shefit të KDI-së, i kam thënë që në qoftë se ju e bëni një analizë të të gjeturave, konkluzioneve dhe rekomandimeve të qeverisë së Republikës së Kosovës, neve është dashur të na vije "marre" të dalim nga takimi. Ata kanë të gjetura, që me të vërtetë i dalin shumë punë prokurorisë themelore dhe speciale. Komunitat po penalizohen për arsye banale, pra, për kontratë kolektive. Për momentin, përkundër kontratës kolektive, ndoshta jemi e vetmja komunë që jemi më komodë. Prej tetë rekomandimeve, ne mund t'i zbatojmë plotësisht 5 prej tyre. Kur ta përfundojmë pikën e dytë të rendit të ditës, do t'i thërras ata të merren me kanalizimin në Krushë. Aty po rikthehen problemet e njëjta me kanalizim. Prej grantit të performancës unë i kam ndarë 498.000€ për këtë projekt që po flasim. Qeveria e Republikës së Kosovës i ka hequr, duke thënë që ju nuk keni të drejtë t'i vendosni aty ku dëshironi ju, si dhe tutje na kanë kushtëzuar që t'i vendosim në projekte të reja. Gjithashtu, ende nuk na kanë dhënë grantin e MAPL-së, ndërkohë që ne e kemi për detyrë që ta harxhojmë sivjet. Me Qeverinë e Republikës së Kosovës, ne kemi probleme serioze dhe jo vetëm ne, por edhe komunitat e tjera. Dje i kam shkruar ministrit të MAPL-së, kërkesë për veprim urgjent. Te vonesat e subvencioneve nga Ministria e Bujqësisë, ministri, edhe pse bukur shpesh po vjen në Rahovec, ende nuk ka përgjigje se kur do t'i japë subvencionet. Fillimi i fushatës do t'i ndihmojë t'i lëshojë më shpejt. Vota në Rahovec, jam i bindur që ai nuk do të marrë. Ndërsa me subvencionet tona për blegtorë, pleh kimik dhe serra, jemi shumë në rregull. Udhëkryqi në Xërxë është kompetencë e Ministrisë së Infrastrukturës. Aty ka probleme me hekurudhë dhe nuk kemi të drejtë të ndërhyjmë. Shpresojmë për ndonjë zgjidhje duke e shfrytëzuar rrugën me 4 korsi, në bashkëpunim me bordin e hekurudhave dhe me ministrinë. Për momentin, për shkak të hekurudhave, as ministria nuk ka përgjigje adekuate. Te çerdhja në Xërxë, nëse është gjendja ashtu siç e the ti, deri më tani do t'i kisha mbi 100 ankesa. Nuk e kemi pranuar asnjë ankesë, as te Drejtoria për Arsim. Nuk themi që standardet aty janë të nivelit më të lartë, megjithatë,

gjendja është e pranueshme që do të ketë përmirësime të mëtejme. Tani do të provojmë t'u dërgojmë ushqimin dhe sigurisht pas certifikimit prindërit do të angazhohen edhe për pagesë. Konkursi për drejtor të QKMF-së: Po, është e qartë, është një konkurs. Afati i ushtruesit të detyrës skadon në dhjetor dhe sipas Zyrës së Personelit, konkursi duhet të shpallet dy muaj para. Konkursi është shpallur dhe të gjitha këto që fliten nëpër rrjete sociale, absolutisht janë të parëndësishme. Konkursi është i hapur, mund të aplikojë edhe ai tjetri dhe ky tjetri. T'ju them të drejtën, nuk e fsheh faktin që aty kam dëshirë të jenë të rinjtë, jo që nuk i respektoj të vjetrit, por QKMF-ja ka nevojë për energji të reja. Po ju them edhe një herë, mos bëni kualifikime, keni kujdes me paraqitje për shkak që unë nuk kam pritur që ndonjëherë të më besojë dikush, e sidomos ti! Është irelevante se çka flet ti! Njëri, fillimisht në mëngjes ia filloi ta shante botën, më pas vendin e tij, njerëzit e tij, dikur më vonë shoqërinë dhe në fund në mbrëmje e shante edhe vetveten. Ministrin që ti sot e akuzon që po bën "pazare" me kryetarin, apo me këdo qoftë, për të njëjtin ke qenë në gjendje të flasësh ku ta di se çka. Rri si i pavarur. Merri incizimet e kuvendit edhe shikoje veten se çka ke folur para 6 muajsh, ose para 3 vjetësh. Po ju them që "mos bëni hop pa e kërcyer gardhin". Unë ndoshta me ministrin nuk pajtohem si ministër, sepse më mirë është që unë të isha ministër e jo ai, por provoni që ministrit tuaj t'ia futni minat e ta tërhiqni vëmendjen diku tjetër, sepse 4-5 ministri nuk i kanë punët hiç mirë. Kryetari i komunës është mirë me ligjin dhe jam krenar që jam mirë me ligjin.

Burim Krasniqi: Më ka rastisur që në ministri të bisedoj me anëtarët e komisionit rreth zgjerimit të rrugës Prizren – Rahovec – Gjakovë - Deçan - Pejë. Ajo që më ka shqetësuar shumë është që ata janë duke tentuar që rrugën aktuale ta bëjnë 4-shiritore, me dy shirita ndihmës dhe me ndarje fizike, si lloj tipi autostrade. Në takim iu kam thënë që kjo është ngufatje për komplet bizneset dhe për këtë zonë këndeje, sidomos për Krushën dhe Xërxën është fatalitet. Ju kërkoj mirëkuptim që të kemi vëmendjen, qoftë edhe si asamble komunale ta nxjerrim një vendim, që ajo rrugë 4-shiritore të mos jetë me 2 shirita ndihmës paralel dhe jo me shumë elemente të tjera shtesë, sepse kjo është fatale për komunën e Rahovecit.

Defrim Kafexhiu: Përshëndetje për të gjithë! I nderuari kryetar, nënkryetar, drejtorë, anëtarë të kuvendit, përfaqësues të KFOR-it, media, zyrtarë komunalë! Të tentosh t'u vësh hi në sy qytetarëve të Komunës së Rahovecit, me diskutime të ulëta kundrejt anëtarëve të kuvendit, ka qenë gjithmonë e dënueshme dhe e patolerueshme. Kolegu i përmendi "pazaret" dhe këtu nuk ka diçka të prekesh. Me një qeverisje të tillë është normale të dyshosh mbi pazaret që bëhen. Ju i keni dhënë tender gati 1 milion euro, koleges tua, deputetes së kuvendit nga radhët e Aleancës. Oferta ka qenë më e shtrenjtë se oferta më e lirë, siç e përcakton ligji i prokurimit. Ofertuesi, burri i deputetes së Aleancës, ka qenë më e shtrenjtë se oferta më e lirë, si mos të dyshohet për "pazare". Pajtohem me ty, që krejt ata që bëjnë "pazare", qofshin edhe shokët e mi, përmendi me emër çdo shokë tonin që bën pazare, se përderisa nuk e përmend me emër, ti po shpif. Nuk është mirë me shpif prej foltores së Kuvendit Komunal. Nuk është mirë t'ua thoni qytetarëve një të pavërtetë.

Kryesuesi: Defrim, vërejtja e fundit, mos bën elaborime dhe komente të tepërta, si dhe dy minuta të kanë kaluar.

Defrim Kafexhiu: Krejt ata që bëjnë "pazare", duke i përfshirë edhe shokët tanë, duke e përfshirë kryetarin edhe neve, e kanë vendin atje ku e kanë vendin kriminelët. Këtu, në kuvend komunal, politikë nuk është mirë të bëhet, sidomos tani në kohë fushate. Politikat bëhen nëpër tubime elektorale, në rrugë e nëpër forume partiake. Ti po na akuzon ne që po bëjmë fushatë, ne nuk jemi kandidatë, ti je kandidat, kryetar. "Sa vota i merr Faton Peci" nuk përshtatet me temat e diskutimit që po i bëjmë në kuvend. Faton Peci i ka punët e veta dhe këto lidhjet e shkurta që po ia përmend, nuk janë të rëndësishme për këtu. Le ta marrë secili atë që e meriton, varet prej punës që bën. Dua të përmend edhe diçka tjetër. Kjo sjellje kundrejt Ilirit është e patolerueshme, sepse pothuajse është njëjtë sikur mua të ma bëjë. Te debati "Jeta në Kosovë" e keni përmendur çështjen e stadiumit. Tash t'i marrim këto kamerat e "Kosova Press"-it dhe ta shikojmë se çka ke thënë për propozimin e Ilirit për stadiumin, del që ti "hajgare" ke bërë me atë propozim. Tani del nëpër çdo emision edhe te "Jeta në Kosovë" krenohesh me projektin e stadiumit të ri të qytetit. Nuk bën kështu, duket t'ia japësh hakun atij që e jep një kontribut, qoftë edhe me një propozim. Te prioritetet qeverisëse të Smajl Latifit, prej mandatit të parë kanë qenë: Arsimi, agroturizmi, shëndetësia, bujqësia. Te çështja e bujqësisë, po e pyes kryetarin, qendra

magazinuese ku është si projekt, sepse ka kaluar afati që është dashur të përfundojë ky projekt që bujqit është dashur tani t'i shfrytëzonin ato hapësira që po bëhen me buxhet të komunës. Në shëndetësi, premtimi i kryetarit ka qenë: Mbulimi i shpenzimeve të pacientëve me sëmundje kronike. Çka ka bërë kryetari i komunës përgjatë tre mandateve për pacientë me sëmundje kronike? Te çështja e agroturizmit, çka keni bërë si kryetar? Përveç rrugëve fushore, sepse rrugën fushore nuk e përbëjnë atë çështjen e agroturizmit si term. Te arsimi: Në prioritetet e keni vendosur që ne po punojmë për një mësimdhënie dhe mësimnxënie cilësore. Në çdo vit pas viti, nuk ka pasur kurrë më shumë mungesa prej nxënësve, nëpër shkolla të mesme. Mungesa e interesimit të nxënësve është e madhe për këtë mësimdhënien që ju po e ofroni me politikat lokale të arsimit. Po ashtu, nxënësit edhe prej shkollave fillore po zgjedhin rrugë të tjera të arsimit dhe jo shkollat publike të Komunës së Rahovecit. Kryesues, më fal që e zgjata pak, faleminderit shumë për kohën!

Kryetari: E para, unë jam udhëheqës politik këtu dhe a bëj politikë apo jo, është vetëm çështje e imja individuale, si dhe e edukimit tim politik. Për momentin nuk kam pasur nevojë të të pyes edhe pse të kam deklaruar si këshilltar special. E dyta, nuk bëj pazare dhe nuk kam bërë asnjëherë. Absolutisht, pazare bëjnë shokët tuaj, ju kallëzoj emrat kur të dalim jashtë. E treta, unë u përgjigjem qytetarëve dhe natyrisht jap llogari edhe në kuvend, si dhe veproj në pajtim me ligjin. Ministri Faton Peci, është ministri më i papërgjegjshëm i Ministrisë së Bujqësisë që e ka pasur ndonjëherë Republika e Kosovës. Njerëzit më bëjnë pyetje pse janë vonuar subvencionet, sepse aplikimet kanë ndodhur në prill. Ia kam thënë edhe para Jeta Xharrës, ia them edhe para RTK-së dhe ia përplasi në fytyrë edhe në mbledhje të qeverisë, nëse ftohem si kryetar komune. Unë mbroj interesin publik. Te çështja e zgjerimit të rrugës, as atëherë, as sot, as asnjëherë, Smajl Latifi nuk ka pasur interes. Ne nuk jemi vendimmarrës, por, nëse japim kontribut e bëjmë për qytetarët. Ne i japim komentet tona në bazë të informatave gjeodezike, kadastrës, pronës, tokave bujqësore etj... Sa i përket çështjes rreth sjelljes ndaj asambleistëve, ju lutem, asnjëherë nuk ia filloj i pari, por ai që ia nis do t'ia kthej 100% dhe dua të thirrrem në atë thënien speciale të Burimit: "ne jemi këtu". Nuk ndodh kjo nëse dikush më quan pazargjy, kriminel ose bllokues, e unë të mos ia kthej. Ia kam kthyer edhe kur ka qenë tepër vështirë, cilitdo që ka tentuar të ma denigrojë personalitetin. Gjithashtu edhe ty, nëse dikush tenton të të denigrojë, unë jam mbrojtësi numër 1. Në këtë kuvend shpifjet nuk kanë vend. Unë i tregova temat që janë diskutuar me ministrin dhe thashë që nuk pritet të ketë zhvillime të shpejta. Unë jam kandidat për deputet, ende nuk e kam zyrtarizuar, por jam. Mos harroni, kurrë në këtë kuvend nuk i përziej gjërat me kandidaturën time për deputet. Nëse ka mbetur puna që këtu t'ju kërkoj votën juve, e keni shumë gabim. Këtu jap përgjigje për secilën qeveri, nëse është interesi i komunës së Rahovecit. Pastaj, pse po e vonojnë hartën zonale? Tani kur duhet të nënshkruhet për ta vendosur në diskutim publik, është arrestuar sekretari i përgjithshëm i ministrisë! Tani vonohet përsëri. Ne jemi të gjallë, jemi dinamikë, kemi informacione që nuk janë për kuvend, por kanë adresa të tjera. Mos harroni, tani për një nënshkrim unë vuaj, sepse nuk e kemi sekretarin e përgjithshëm dhe nuk ka u.d. Janë fenomene të çuditshme. Shumë kanë qejf të më ngrenë edhe aktakuzë, po çfarë të bëj unë, jam kështu, kam qëlluar burrë i mirë dhe kryetar i mirë. Te pyetja, çka keni bërë në arsim? Mos bëni hajgare, ne kemi ndërtuar shkolla të reja, kemi rinovuar shkolla, kemi zbatuar programin e eficiencës së energjisë, kemi bërë pakon pedagogjike që nuk e ka bërë asnjë komunë e Republikës së Kosovës dhe i kemi realizuar të gjitha premtimet për mësimdhënie dhe mësimnxënie. I kemi furnizuar me laboratorë, me pajisje të teknologjisë informative. Unë e di që këtu në kuvend ka njerëz të mençur që ia ftohin edhe GAP-it e administratës së Biden-it. Premtimet e realizuara dhe të evidentuara janë nga GAP-i dhe unë nuk kam asnjë komunikim me ta. Te premtimet e përmbushura janë 53, bile duhet të jenë 55, sepse 2 premtime kam dilema pse nuk i kanë pranuar. I kam marrë përgjigjet pse janë hequr dhe deri në fund të mandatit të gjitha do të jenë të përmbushura, gjysmë të përmbushura dhe eventalisht ndonjë premtim i filluar. Këtu matemi me punë, jo kush po flet më mirë. Në shëndetësi: Ekipi mobil ofron shërbime falas edhe te njerëzit me sëmundje kronike. E dyta, njerëzve që kanë sëmundje, ne iu japim një ndihmë simbolike për t'ua lehtësuar barrën. Janë me qindra raste të tilla. Në shëndetësi dhe në arsim, dukshëm ka zhvillime të mëdha.

Eqrem Spahiu: Faleminderit, kryesues! I nderuari kryetar, nënkryetar, drejtorë, kolegë asambleistë. Te sanimi i problemeve në AMF-në e Optrushës, a është ndërmarrë ndonjë gjë apo do ta ketë fatin e njëjtë sikur sistemi i ujitjes pikë-pikë? Gjithashtu, a duhet dikush të japë llogari në lidhje me këto probleme?

Ilir Pallqa: Kryetari e përmendi që dikur i kemi thurur lëvdata ministrit. Unë nuk i kam thurur lavde ministrit që 4 vjet, por, e lëvdoj nëse bën diçka të mirë për Rahovecin, kur bën keq e kritiko. Unë kam qenë pjesë e peticionit dikur. Unë jam kundër interesave të ngushta që janë në dëm të komunës, qoftë edhe shok e familjar i imi. Liburn Aliu, fjalë për fjalë ka thënë publikisht: “Jam kundër autostradës, jam për zgjerimin e rrugës”. Gjithashtu, në atë kohë kur e ka thënë, hekurudha ka qenë aty ku është tani. Unë nuk po flas me ekspertizë, por vetëm si banor që kam hall si i përzgjedhur edhe pse ndonjëherë kryetari po më nënçmon, por jam i zgjedhur, s’kam çka të bëj. Për ekspert jeni ju, e keni dëshmuar ekspertizën tuaj lart e poshtë, e kemi parë, po e shohim. Unë fola, që kjo, sipas bindjes time, është dëm i pakthyesëm i komunës, kjo është bindje personale. Nëse kryetari po mendon që kuvendi nuk është vend ku flitet kjo, atëherë ne ulemi me ndonjë qebaptore edhe flasim.

Hasan Përboqi: Mirë që Iliri po bindet që asgjë nuk kanë bërë, e as nuk do të bëjnë për Rahovecin. Prej përvojës me këto, mund të garantoj që as ky projekt në Xërxë nuk do të bëhet, por, tani është kohë fushate edhe i duhet për ndonjë votë. Mos u “tut” Ilir, nuk do të ketë as zgjerim, as autostradë. Zgjerimi i rrugës ka mundur të bëhet edhe më herët para 4 vjetësh kur kanë ardhur në pushtet, por tani që po vijnë zgjedhjet i ka shkuar mendja për këto ide. Pas zgjedhjeve, këto gjëra harrohen, por “inshallah” ky ministër nuk vjen më.

Afrim Limani: I nderuar kryesues, të nderuar asambleistë! Do t’i përgjigjem pyetjes së Burimit. Deri më tani, ngarkesa financiare e kontratës kolektive është 5.155.000€, nga kjo shumë deri më tani janë paguar 2.704.00 dhe kanë mbetur edhe 2.451.000€. Për pjesën e mbetur, ne e kemi adresuar një kërkesë në Ministrinë e Financave, me mundësinë që kjo vlerë të bartet në 3-mujorin e ardhshëm të vitit 2025. Vlera e pagesave ndër vite, për kontratën kolektive: 2021 - 8268€, 2022 – 173.400, 2023 – 825.880, 2024 – 1.696.000€. Rreth 98% e këtyre janë të ekzekutuara nga kategoria e pagave dhe e mëditjeve. Lirigzoni bëri pyetje rreth buxhetimit të tri çerdheve: Përkundër dy kërkesave që i kemi bërë para qarkores së parë dhe të dytë buxhetore, nuk na kanë aprovuar dhe faktikisht tri çerdhet kanë ngelur si të pabuxhetuara. Ne si komunë, nga programi i administratës së përgjithshme kemi menduar për këtë gjë dhe i kemi ndarë 230.000€ për funksionalizimin e tri çerdheve.

Burim Krasniqi: Kur të keni kohë, sa është vlera bazë e shpenzimeve gjyqësore dhe përmbarimore, bashkë me kamatë?

Afrim Limani: Të thashë që e kam vlerën totale, bashkë me shpenzimet e kamatës, që janë prej 5.155.000€ dhe matematikisht t’i mund ta shumëzosh me 8% dhe në fund të del kamata, pa shpenzime administrative.

Afrim Dina: Faleminderit, kryesues! Të nderuar kolegë drejtorë, anëtarë të kuvendit! Pata një pyetje nga z. Hasan Përboqi. Në kompleks sportiv janë duke u bërë të gjitha përgatitjet e fundit që K.F. “Rahoveci” dhe klubet e tjera të komunës tonë t’i zhvillojmë ndeshjet vendas. Shpresojmë që loja K.F. “Rahoveci” me “Lirinë” të luhet në kompleks sportiv.

Rasim Fazliu: Faleminderit, kryesues! Përshëndetje për të gjithë të pranishmit në sallë! Pyetja ime është rreth projektit të kullimit të tokave, Fortesë – Celinë. Po e shoh që janë duke u bërë disa kanale të hapura. Pyetje është kështu: Për të gjitha ujërat që vijnë, a do të bëhet një kanal përkaj asfaltit, në mënyrë që uji të bartet në kanalet tjera?

Drilon Mustafa: Përshëndetje kryesues! Përshëndetje për të gjithë kolegët. Do t’i bëj dy propozime për stafin e kryetarit. Propozimi i parë: Të bëhet një deponi për mbetje të ngurta në zonën kadastrale – Kramovik. Aty është një pjesë e rrethuar prej 3 ha, e cila është shfrytëzuar për zhavorr për nevojat e autostradës. Brenda aty është një gropë ekzistuese dhe kompania në fjalë ka licencë për shfrytëzim për 5 vjet, i ka mbetur edhe 1 vjet. Prona do të kalojë si aset i komunës dhe ta shfrytëzojmë si deponi për mbetje të ngurta. Propozimi i dytë: Ky propozim ka të bëjë me sheshin qendror. Ditëve të fundit po e shohim që sheshi po e merr formën e duhur. Ka mbetur pa u trajtuar hotel “Park Plaza”. Hoteli e ka një arkitekturë të mire për objekt administrativ dhe propozoj që institucionet komunale të vendosen në atë objekt. Arsytet e mia janë të shumta. Ka të bëjë gjithashtu edhe me zhvillimin e politikës në Evropë, që institucionet të vendosen në

sheshe qëndrore, të cilat aty bartin më shumë siguri. E lus kryetarin dhe stafin e tij që këto dy kërkesa t'i marrin me seriozitet, të ma kthejnë një përgjigje apo t'i ekzekutojnë.

Sejfullah Sejfullahu: Faleminderit! Unë nuk dëshiroj të flas më, sepse kam folur mjaft, por, pas asaj që dëgjova, “niveli qëndro e niveli lokal” më shkoi mendja te Gjergj Fishta kur e pyetën se çka mendon për shqiptarët: “Shqiptarët janë shumë njerëz të mirë, por janë të çuditshëm, sepse më tepër gëzohen kur t'i ngordhë lopa kojshisë, sesa kur “pjellë” e vetja”. Duke i parë të gjitha këto zhvillime që po pengohen nga niveli qendror në atë lokal, propozoj që si ndërmjetësues ta marrim Lajçakun ose grupin e Quint-it.

3. Shqyrtimi dhe miratimi i propozim-vendimit për miratimin e Planit Lokal për Mbrojtje nga Dhuna në Familje, 2024-2026:

Alban Gashi: Faleminderit kryesues! Përshëndetje për të gjithë. Ky plan është një përpjekje e përbashkët e grupit punues për hartimin e planit të veprimit, mekanizmit koordinues lokal kundër dhunës në familje në Rahovec, nën koordinimin e zyrës së kryetarit dhe me përkrahjen e misionit të OSBE-së në Kosovë. Plan i bazohet sipas ligjit nr. 08.L/185. Dokumenti ka qenë në konsultim publik nga data 15 gusht-16 shtator dhe konsultimi publik me qytetarë është mbajtur më 9 gusht. Pjesëmarrësit kanë dhënë ide, të cilat janë inkorporuar në brendi të planit. Plan i është i mbështetur në tri objektiva strategjike: Përmirësimi i sistemit institucional për parandalimin dhe ofrimin e shërbimeve cilësore për mbrojtjen nga dhuna në familje, dhuna ndaj grave dhe dhuna në baza gjinore, përmirësimi i qeverisjes lokale për parandalimin dhe mbrojtjen nga dhuna në familje dhe objektiva e tretë është fuqizimi i shërbimeve rehabilituese dhe riintegruese të viktimave të dhunës në familje, dhunës ndaj grave dhe dhunës në baza gjinore.

Lirigzon Kastrati: Faleminderit! Në emër të grupit e përshëndes këtë iniciativë. Rastet me dhunë në familje, nga janari deri në shtator 2024 janë 37. Sipas ligjit, komunat janë të detyruara t'i formojnë këto mekanizma. Një pyetje: Sa është buxheti i ndarë nga ana e komunës për funksionimin e planit të veprimit?

Defrim Kafexhiu: Dua të të pyes rreth bashkëpunimit të zyrës së juaj me Qendrën për Punë Sociale, si është raporti?

Burim Krasniqi: Faleminderit kryesues! Komuna bashkë me QPS-në, a kanë shërbime të psikologut? Ato gra, apo ata fëmijë që i nënshtrohen dhunës në familje, a kanë trajtim falas te psikologu? Nëse jo, ju kërkoj që në të ardhmen të realizohet, nëse ka nevojë marrim edhe vendim si asamble komunale, që ky shërbim të realizohet qoftë për atë që e ka ushtruar dhunën në familje, qoftë për atë që i është nënshtroar dhunës në familje.

Alban Gashi: Te pyetja e Lirigzonit, rreth buxhetit: Buxheti për këto 3 vite prej komunës dhe prej donatorëve është 25.000€. Sa i përket raportit me QPS-në, vetë drejtori e ka nënshkruar dhe është anëtar i këtij mekanizmi. Te pyetja e Burim Krasniqit, ndoshta duhet t'i përgjigjem me shkrim, pasi edhe Drejtoresha e Shëndetësisë nuk është këtu.

Kryesuesi: Faleminderit Alban Gashi. Nëse nuk ka dikush diçka tjetër, e vendosim në votim. Kush është “për”?... Kundër?... Abstenim?... Me shumicë votash (20) aprovohet pika e tretë.

4. Shqyrtimi dhe miratimi i propozim-vendimit për miratimin e Planit Lokal të Veprimit në Mjedis, 2024-2028:

Bjondina Ramaj: Përshëndetje për kryesuesin, drejtorët, asambleistët. Është kënaqësi që para jush të shpalosi në pika të shkurta Planit Lokal të Veprimit në Mjedis, 2024-2028. E falënderoj shumë drejtorin për përkrahjen dhe për punën e përbashkët. Ky plan nuk ka mbështetje nga donatorët apo dikush tjetër. Ne si drejtori e kemi punuar bashkë me grupin punues. Plan i është voluminoz, i ka të përfshira të gjitha udhëzimet dhe ligjet e komunës dhe ministrisë. Të gjitha janë të prekshme, asgjë nuk është shënuar e që në realitet nuk mund të realizohet. Prioritetet: Mbrojtja e resurseve dhe menaxhimi i ujit, përmirësimi i cilësisë së ajrit dhe fuqizimi i bashkëpunimit ndër-institucional për mbrojtje të mjedisit.

Burim Krasniqi: Sa i përket mbrojtjes së ujërave, a është kompetencë e komunës apo e Agjencisë për Menaxhimin e Ujërave dhe në çfarë kuptimi mendohet t'i mbrojmë ujërat?

Bjondina Ramaj: Siç e din edhe ti, mbrojtja e ujërave është në kompetencë të ministrisë. Mbrojtjen e ujërave mendojmë ta zhvillojmë duke i pastruar të gjitha përroskat që i kemi në komunën tonë. Në bazë të udhëzimit administrativ për leje ujore, ne jemi kompetentë për një sasi të vogël, për disa puse, për të tjera është ministria.

Kryesuesi: Faleminderit Bjondina Ramaj! Nëse nuk kemi diçka tjetër, e vendosim në votim. Kush është “për”?... Kundër...? Me shumicë votash (19) aprovohet edhe pika e katërt.

5. Shqyrtimi i Raportit Financiar, janar-shtator 2024:

Afrim Limani: Faleminderit! Ky është raporti financiar janar-shtator. Të hyrat bashkë me gjoba të gjykatave dhe të trafikut janë 1.640.000 dhe kur e krahasojmë me periudhën e njëjtë me vitin e kaluar, kemi një diferencë në negative prej 49.938€. Në këtë raport i kemi të paraqitura të hyrat e analizuara në mënyrë analitike sipas kodeve ekonomike. E kemi shpërndarjen e faturave të tatimit në pronë. E kemi shpenzimin e buxhetit deri në këtë periudhë, i cili është 17.466.000€ (81.36%). Qëndrojmë mirë edhe te investimet kapitale, ku deri më tani në këto momente që po flasim, i kemi shpenzuar 84-85%. Në këtë raport i kemi të përfshira në mënyrë analitike edhe shpenzimet e kategorisë mallra dhe shërbime, raportin e shpenzimeve për komunalitet dhe krejt në fund i kemi raportin e kontratave të lidhura deri më tani. Kontratat janë me furnizime në shërbime dhe të investimeve kapitale 7.964.000€.

Burim Krasniqi: Faleminderit kryesues! Në faqen 16, te tabela 3.4 - furnizimi me dru, në vitin 2024 ka 100% rritje të vlerës. A ka një arsye pse është 100% më e madhe? Prej 148.324€ në 235.568€. Tjetra, nuk e pashë askund furnizimin me pelet, a përfshihet edhe peleti bashkë me dru, apo pjesa e peletit është kod i veçantë? E fundit, kontratat janar-shtator 2024 e kapin vlerën rreth 8 milionë euro, si qëndron çështja e mbulueshmërisë financiare për këtë projekt? A pritet që projektet që janë dy vjeçare, të zgjasin më shumë se dy vjet dhe të vazhdojnë deri më 2027-2028?

Defrim Kafexhiu: Faleminderit kryesues! Detyrohem të dal pak jashtë temës, por, te të hyrat prej gjobave në trafik po e shohim se shifra më e vogël se në vitin e kaluar, dallimi është rreth 30% më pak. E ftoj kryetarin që në mbledhjen e KKSB-së të shtrojë çështjen e parkingut joadekuat në trotuare, qoftë ditën edhe natën. E dimë që është përgjegjësi komplet e policisë, por të paktën është mirë që ky problem të fillojë të përmirësohet.

Lirigzon Kastrati: Faleminderit kryesues! Faqe 11, tabela 3.3, te mallrat dhe shërbimet: Saktësisht te shërbimet kontraktuese tjera, po e shoh që zyra e kryetarit në vitin 2023 shërbime të tilla ka në vlerë prej 8451€, kurse këtë vit 180€. Po ashtu, administrata në vitin 2023 ka 6366€, kurse këtë vit 1409€. Një sqarim rreth kësaj?

Afrim Limani: Faleminderit për pyetjet! Burim, mund të ndodh që ndonjëherë kemi shpenzim më të madh se sa gjendja aktuale, sepse ne kemi faturën në dispozicion, kemi mjete financiare dhe bëhet ekzekutimi. Treguesi më i mirë që e përcakton gjendjen dhe krahasimin në mes të dy viteve është fundiviti fiskal. Në këtë raport nuk e kam prezantuar raportin e obligimeve kontraktuale, sepse atë bëhen në fund të vitit fiskal dhe do të shihen të gjitha. Sa i përket mbulueshmërisë të investimeve kapitale, matematikisht qëndrojmë mirë. Në krahasim me vitet e tjera, duhet të pranoj se në kategorinë mallra dhe shërbime kemi obligime më të mëdha, por besoj që deri në fund të vitit do t'i menaxhojmë mirë. Defrim, përafërsisht të hyrat janë të njëjta në krahasim me periudhën e njëjtë të vitit të kaluar, sepse jashtë raportit që e keni ju, para dy ditëve ka ardhur edhe raporti i gjobave të gjykatave dhe të trafikut dhe kur i analizojmë dalin përafërsisht njëjtë. Çfarë shpenzime janë në kudër të “te shërbimeve kontraktuese tjera”. E kemi një kompani që e ka fituar projektin për mbikëqyrje dhe një në faturë ka 38.000 dhe fatura tjetër është 30.000 për t'u paguar. Për mbikëqyrje të projekteve dalin të jenë rreth 60.000€. Hartimi i projekteve për fermerë, 29.000. Trusti pensional i konsulentëve, 4000. Vaksinimi i qenve endacakë, 33.000€. Hartimi i planit komunal për energji të qëndrueshme, 3820€. Hartimi i planit lokal për biodiversitet dhe për cilësi të ajrit, 51.000€. Rrënimi i objekteve pa leje, 32.000€ dhe AZHR-ja 7700€.

Ilir Pallqa: Faleminderit kryesues! Te faqja 10, te karburanti për vetura në vitin 2023 shpenzimi ka qenë 9400€, kurse në vitin 2024 është 11.800€. Me sa e di unë, vitin e kaluar karburanti ka qenë më shtrenjtë. Kryetari i përdorë veturat zyrtare me të drejtë edhe për të shkuar te mbledhjet e asociacionit të komunave. Kryetar, çka ndodhi në atë asociacion?

Kryetari: Faleminderit! Në çdo mbledhje të KKSB-së ne i ftojmë policinë, që të reagojë dhe t'i lirojë trotualet. Marrim çdo herë zotime, mirëpo veprime konkrete jo edhe shumë. Ne e kemi potencuar faktin që ka vetura që “fleen” me javë nëpër trotuare, sidomos prej stacionit të autobusëve e lartë. Ju mund t'i lexoni edhe procesverbalet, vërtetë çdo herë i kemi këto kërkesa, sepse gjithmonë në KKSB merr pjesë edhe komandanti i stacionit policor. Veturën zyrtare e përdori më pak se sa që mendon dikush. Pas orarit të punës, e përdori vetëm veturën private. Kanë disa që mos i përdorni veturat

zyrtare, e këta që kanë thënë kështu po i përdorin vetë dhe kjo është keq, përkundër asaj që kryetari, ministri, kryeministri e kanë të drejtën ligjore ta përdorin 24 orë. Te shërbimet e karburantit marrin pjesë edhe zjarrfikësit, si dhe ndonjë veturë zyrtare që përdoret nga OJQ-të. Shumat janë minimale dhe besoj që është brenda planit. Te asociacioni, dikush ka menduar që ka të drejtë dhe ka tentuar ta bllokojë foltoren. Bordi i asociacionit e ka ndërprerë aktivitetin, sepse ata e kanë bllokuar foltoren. Statuti është statut dhe nuk ndërrohet shpesh. Iliri, ti ke qenë me një parti, tani je i pavarur dhe ne nuk mund ta ndërrojmë statutin e komunës veç pse ti je i pavarur. Aty kam qenë në rolin e një “zjarrfikësi” edhe pse kurrë “zjarrfikës” nuk kam qenë, por në atë rast Ramiz Lladrovci ka pasur të drejtë. Ka ndodhur njëjtë sikur ju tani ta votoni rendin e ditës dhe të ngrihet Ilir Pallqa e të thotë që nuk do ta vazhdoni mbledhjen e kuvendit. Sidoqoftë, Asociacioni i Komunave është një subjekt shumë i rëndësishëm me një rol të rëndësishëm. Dallimet për momentin janë vetëm me qeverinë, sepse nevoja për përkrahje është e madhe dhe mungesa e përkrahjes është evidente. Përplasje fizike nuk ka pasur edhe pse ka qenë e mundur të ketë. Komunitetet veriore ne i respektojmë shumë. Dikush është aty me 100 vota edhe pse është kryetar komune. Ideja ka qenë që “duhet të përfaqësohemi në asociacion”, por, nëse nesër mbahen zgjedhjet atje dhe fiton një kandidat serb, atëherë bordi i asociacionit do të dominohet nga elementi etnik dhe mund të kemi probleme në vendimmarrje.

Ilir Pallqa: Te asociacioni aty, a jeni duke e diskutuar “grantin e katërt”, sepse ka qenë premtim elektorale?

Kryetari: Një nga premtimet e kësaj qeverie, qysh para 5 vjetësh është që “grantin e katërt” do të jepet për komuna! “Njerin nga Gjakova e pyetnin, çka u bë kështu, ti ke thënë vetë? Çfarë të bëj, i kam hëngër fjalët e mia”. Unë nuk i takoj këtij koncepti politik. Grantin e katërt do të ishte zgjidhje fatlume për të gjitha komunitetet e Republikës së Kosovës. Shqetësimi i parë që e paraqet Agim Aliu në emër të asociacionit është “grantin e katërt”.

6. Shqyrtimi dhe miratimi i vendimit për dhënien në shfrytëzim afatgjatë të pronës së paluajtshme të komunës, P-00772-10, ZK- Xërxë:

Erhan Morina: Faleminderit kryesues! I nderuar kryetar, kolegë drejtorë, anëtarë të kuvendit. Para jush e keni materialin për plotësim-ndryshimin e vendimit të datës 23 gusht të këtij viti. Nga MAPL-ja është rekomanduar që të ndryshohet pak procedura dhe nga dhënia në shfrytëzim në periudhë afatgjatë, të bëhet përmes shprehjes së interesit.

Kryesuesi: Faleminderit drejtor! A kemi ndonjë diskutim? Nëse jo, atëherë e vendosim në votim. Kush është “për”?... Kundër?... Me shumicë votash (18) aprovohet pika e gjashtë.

7. Shqyrtimi dhe miratimi i propozim-vendimit për shpalljen me interes të përgjithshëm pjesë e parcelës, 05537-2, ZK- Rahovec:

Afrim Oruqi: Faleminderit kryesues! Po shpallim me interes të përgjithshëm pjesën e parcelës 05537-2, ZK – Rahovec, në dalje të Rahovecit, me sipërfaqe 5.4m², nga sipërfaqja e përgjithshme prej 300m² në vendin e quajtur Przhina me pronar Timendar Shtavica. Gjatë ndërtimit ka prekur një parcelë të komunës dhe ka pasur kërkesë të vazhdueshme për legalizim të objektit. E kemi shqyrtuar kërkesën dhe qëllimi i këtij vendimi është këmbimi i pronës private me atë komunale.

Defrim Kafexhiu: Drejtor, çka pason pas këtij vendimi dhe pse në material nuk është ortofotoja? Një pyetje tjetër: Ku është interesi i komunës së Rahovecit për ta rregulluar këtë pjesë të parcelës, duke e ditur që ka edhe objekte të tjera që janë në të njëjtin proces?

Burim Krasniqi: Drejtor, a është objekti në rrugën për Brestoc? Në gjeoportali po e shoh që në 80% të parcelës është objekti i ndërtuar dhe nuk është ashtu siç shkruan në vendim, sipërfaqja 5.4m². Nuk e di kush është pronari, nuk dua të paragjykoj, por objekti është i ndërtuar i tëri në këtë parcelë.

Afrim Oruqi: Objekti nuk është pronë komunale, është privat.

Nënkryetari: Burim, para ndërtesës për banim kolektiv është një shtëpi private dhe aty është 5-6 metra që dalë jashtë pronës private, duke u futur në pronë të komunës.

Afrim Oruqi: Defrim, në këtë drejtim nuk kemi kërkesë të patrajtuar të banorëve. Kur ka kërkesë që objekti e ka prekur pronën publike, analizohet nga Drejtoria e Urbanizmit dhe e Kadastrës dhe nëse rrezikohet trotuari apo rruga, ne nuk e

vendosim në kuvend. Vetëm nëse është interes të përgjithshmin, në këtë rastin edhe tonin si komunë. Me këtë variant në të ardhmen veç zgjerohet rruga dhe në terren asgjë nuk humbim.

Kryesuesi: Faleminderit drejtor! A kemi ndonjë diskutim? Nëse jo, atëherë e vendosim në votim. Kush është “për”?... Kundër?... Me shumicë votash (19) aprovohet pika e shtatë. Vazhdojmë me pikat 8, 9 dhe 10-të, sepse ndërlidhen mes vete.

8. Shqyrtimi dhe miratimi i propozim-vendimit për themelimin e institucionit për edukim në fëmijërinë e hershme në Krushë të Madhe të Komunës së Rahovecit:

9. Shqyrtimi dhe miratimi i propozim-vendimit për themelimin e institucionit për edukim në fëmijërinë e hershme në Ratkoc të Komunës së Rahovecit:

10. Shqyrtimi dhe miratimi i propozim-vendimit për themelimin e institucionit për edukim në fëmijërinë e hershme në Xërxë të Komunës së Rahovecit:

Avni Morina: Faleminderit kryesues! I nderuar kryetar, anëtarë të kuvendit, drejtorë, drejtoresha. Kam kënaqësinë që sot, në emër të kryetarit të komunës t’ju propozoj një propozim-vendim që është në përputhje me nenin 3 dhe 7 të udhëzimit administrativ të MASHT-it NR. 10/2023, për kriteret dhe procedurat e themelimit dhe pushimit të veprimtarisë së institucioneve arsimore parauniversitare. Këto tri propozim-vendime vijnë si rezultat i angazhimit tonë që e kemi pasur gjatë muajve të fundit. Kemi marr pëlqimin nga Ministria e Arsimit për themelimin e institucionit për edukim në fëmijërinë e hershme në Krushë të Madhe, Ratkoc dhe Xërxë dhe sipas udhëzimit administrativ të MASHT-it nr.10/23 duhet të merret miratimi nga kuvendi komunal. Paraprakisht, komuna jonë i ka plotësuar të gjitha kriteret e këtij udhëzimi administrativ. Kodet e institucioneve janë këto: Krusha e madhe e ka kodin 250/3, Ratkoci 250/2 dhe Xërxë 250/4. Vendimi hyn në fuqi pas miratimit nga kuvendi i komunës.

Burim Krasniqi: Drejtor, absolutisht nuk jemi kundër në kuptimin parimor. Në momentin që bëhen institucione të pavaruara, a rritet numri i punëtorëve dhe a krijon kosto financiare për Komunën e Rahovecit dhe a ekziston mundësia që këto të jenë në kuadër të një institucioni. Kam informata që është sfidues numri i fëmijëve në çerdhe dhe ne jemi duke i bërë institucione, një drejtor, një administratë dhe ende pa e testuar mirëfillshëm këtë punë, ndoshta është pak herët?!

Avni Morina: Ne si Drejtori e Arsimit kemi bërë kërkesë për pëlqim për themelimin e këtyre institucioneve, duke iu përmbytur të gjitha kriteret që kërkojnë sipas udhëzimit administrativ. Secila prej çerdheve ka pëlqim dhe vendim të veçantë dhe sipas komisionit të MASHT-it të tri çerdhet i plotësojnë kriteret për të qenë institucione të pavarura edukative të fëmijërisë së hershme. Sfidë e kemi Krushën e Madhe që për moment janë 23 fëmijë, ndërsa në Xërxë janë mbi 80 dhe në Ratkoc janë 75. Shpresojmë që edhe në Krushë të Madhe do të rritet numri i fëmijëve, sepse ka shumë prindë që fëmijët e tyre i dërgojnë në çerdhe private në Krushë të Vogël. Në momentin që themelohen këto institucione, neve na hapet rruga të hapim konkurs për drejtorë apo drejtoresha.

Shqipe Kryeziu: Faleminderit kryesues! Drejtor, të përgëzoj për punën që po bëni. A e keni menduar pjesën e punëtorëve teknikë, që të kujdesen për ngrohje qendrore?

Avni Morina: Do të kemi nevojë edhe për mbështetës teknikë, sidomos për periudhën e dimrit. Për momentin, kemi argumente të mjaftueshme për Ministrinë e Financave që të paktën prej vitit të ardhshëm ta rrisim stafin mbështetës, por edhe për edukatore.

Iliri Pallqa: E përgëzoj Shqipen për përgëzimet që po i bën. Kryetari, për çerdhen në Opterushë që e keni pasur premtim elektoral, a ka diçka?

Kryetari: Për t’ia kujtuar vetes premtimet, e ka pasur për Opterushë, Drenoc dhe Qifllak. Në praninë tuaj atë ditë, i thashë Jeta Xharrës që, nganjëherë njeriu nuk mund ta ketë analizën dhe informacionet deri në fund. Raporti i UNICEF-it dhe MASHT-it ka thënë që nuk parashihen çerdhet në këto lokalitete. Nuk e ka pasur premtim të programit zgjedhor, por të paraqitjes te Jeta Xharra. Përndryshe nëse ka fëmijë, do të ishte mirë që edhe në këto lokalitete të ketë çerdhe. Sidoqoftë, unë nuk i premtoj 160 çerdhe dhe të ndërtoj kaq pak në Republikën e Kosovës.

Iliri Pallqa: Kryetar, të ftoj që mos të merresh më me këto premtime lokale, por të merresh me ato gjenerale në nivel të Kosovës, saktësisht ta premtosh fuqishëm “grantin e katërt” dhe ta japësh fjalën që nëse bëhesh deputet e lëshon postin e kryetarit të komunës, kjo t’i rritë gjasat që të bëhesh deputet.

Kryetari: Faleminderit, këshilltar i dytë special, pas Defrim Kafexhiut. Njëri nga vetëvendosja dhe tjetri i pavarur dhe me këtë të fundit duhet të kem kujdes më të madh, sepse ka mundësi që do të jemi bashkë në paraqitjen e zotimeve para publikut.

Leonard Morina: Përshëndetje për kryetarin, nënkryetarin, drejtorët e drejtorive, kolegë asambleistë. Me sa e kuptova, këto tri çerdhet do të jenë të pavarura nga njëra tjetra. Ky staf që është punësuar në këto tri çerdhe, a e kanë listën e pagës me emrin e çerdes, apo janë të shpërndara nëpër shkolla të komunës së Rahovecit?

Avni Morina: Programi i arsimit i ka tri nivele: Programi parafillor, programi fillor i mesëm i ulët dhe programi i mesëm i lartë. Në listë të pagave, në çerdhen “Tulipanët” në qytet janë vetëm 9. Aty kemi angazhuar me të drejtë edhe edukatore shtesë, të cilat janë në programin parafillor. Raste të tilla kemi raste edhe në çerdhe të tjera, sepse i takojnë të njëjtit program.

Kryesuesi: Faleminderit drejtor! Nëse nuk kemi diçka tjetër, e vendosim në votim pikën e parë të propozuar nga drejtori. Kush është për?... Kundër?... Me shumicë votash (24) aprovohet pika e tetë. Kush është “për” aprovimin e pikës së nëntë? Kundër?... Me shumicë votash (24) aprovohet edhe pika e nëntë. Kush është “për” aprovimin e pikës së nëntë? Kundër?... Me shumicë votash (24) aprovohet edhe pika e dhjetë.

11. Shqyrtimi i informatës nga DMSH-ja, lidhur me situatën e zjarreve gjatë sezonit së verës:

Besmirë Bytyqi: Faleminderit kryesues! Të nderuar të pranishëm, në emailat e juaja e keni pranuar një informatë të shkurtër në lidhje me situatën e zjarreve gjatë sezonit së verës. Gjatë muajit korrik-gusht, periudha në të cilën temperaturat kanë qenë shumë të larta, territori i komunës është përballur me një situatë alarmante të zjarreve dhe janë kapluar dhjetëra hektarë tokë. Zjarrfikësit tanë që me numër janë vetëm 17, kanë punuar me përkushtim të madh në lokalizimin e zjarreve. Në korrik kanë ndodhur 79 vatra të zjarreve, në muajin gusht, ekipi ynë ka intervenuar në 80 vatra. Komuna e Rahovecit ofron gjithë logjistikën për njësinë e zjarrfikësve në Rahovec, në mënyrë që ta lehtësoj punën e tyre, e cila sa është e vështirë, është edhe e rrezikshme për shëndetin dhe jetën e tyre.

Sejfullah Sejfullahu: Faleminderit drejtoreshë për informatën! Ashtu siç kemi kritika e kërkesa, rendi e don që edhe t’i përgëzojmë zjarrfikësat për punën e bërë, sidomos në terrenin e Krushës dhe më vjen keqardhje për gjendjen e tyre dhe kushtet jo të mira të punës.

Defrim Kafexhiu: Gjithashtu e përgëzoj njësitin e zjarrfikësve në Rahovec, si një grup që vazhdimisht japin kontribut. Në bazë të kushteve që i kanë dhe në bazë të situatës ligjore ku ata janë, është një personel për t’u vlerësuar.

Burim Krasniqi: Drejtoreshë, në njërën prej seancave të na përcjellësh një informatë rreth gjendjes së zjarrfikësve në Komunën e Rahovecit. Për kushtet, pajisjet, kërkesat dhe nevojat.

12. Shqyrtimi dhe miratimi i propozim- vendimin për transferimin (harmonizimin) e mjeteve buxhetore 2024:

Afrim Limani: Duke u bazuar në të gjitha mundësitë ligjore, pas analizës së bërë nga Drejtoria për Buxhet dhe Financa në pozicionin e pagave, kemi konstatuar se në disa programe kemi tepricë të mjeteve deri në fund të vitit fiskal. Kjo tepricë e kap vlerën prej 484.184€. Propozimi ynë është që kjo vlerë të bartet për muajin nëntor dhe dhjetor në kategorinë e pagave, kryesisht te arsimit fillor, sepse aty jemi minus si rezultat i kontratës kolektive, në vlerë prej 1.622.000 dhe kur e shtojmë këtë vlerë të propozimit atëherë kjo vlerë bëhet 1.144.000€. Fatura mujore për paga është 867.000€, që i bie deri në 80% kemi hapësirë për mbulimin e pagave.

Burim Krasniqi: Drejtor, për shkak të kontratës kolektive, pa paga ka mbetur sektori i arsimit, në muajin nëntor dhe dhjetor, apo jo? Nëse këto mjete barten, a mbulohen pagat e nëntorit dhe dhjetorit, apo përsëri mbetet sfida muaji dhjetor? Nëse jo, cilat janë veprimet që duhet t’i ndërmerr komuna apo kuvendi që secili sektor publik mos të mbetet pa paga?

Defrim Kafexhiu: A përballen edhe komunat tjera me situata të tilla? Si në këtë rast, te harmonizimi i buxhetit në paga dhe mëditje. Kur është bërë planifikimi i buxhetit për vitin 2024, a ka dalë jashtë planifikimit kjo, apo është brenda kornizave, apo duhet të krijojmë zgjidhje patjetër për çështjen e kësaj kategorie të arsimit?

Hasan Përboqi: E falënderoj drejtorin për këtë përgatitje të këtij dokumenti. Iliri po hidhërohet kur po ju përgëzoj, por me të vërtetë kjo lëvizje strategjike është për t'ju përgëzuar. Me këtë lëvizje janë bërë dy goditje: E para është që mos të bllokohen me paga nëpunësit publikë dhe e dyta është që këto para mos të shkojnë në suficit. Këtë lëvizje duhet ta marrin përbazë edhe komunat tjera.

Afrim Limani: Faleminderit Hasan, ti tregove diçka që e kemi përgatitur bashkë këtë strategji! Burim, unë e ndava me ju një informatë shumë të detajuar. Ne i kemi bërë disa lëvizje të mira, duke e shfrytëzuar të drejtën për harmonizim të pagave dhe jemi bazuar kryesisht në ligjin e financave publike dhe përgjegjësi, neni 15, pika 8. Përmbaruesi për kontratën kolektive deri më tani i ka marrë 1.6 milionë dhe me të njëjtën shumë të mjeteve jemi deficit në pozicionin e pagave. Në anën tjetër, i kemi tepricë të mjeteve 482.000€ dhe deficit mbetet 1.100.000€. Fatura mujore për Komunën e Rahovecit është 860.000€ dhe faktikisht i bie që nëse e bëjmë këtë harmonizim, 70% të pagave për muaji nëntor kemi mundësi t'i mbulojmë. Sipas ligjit, për muajin dhjetor do ta bëjmë një kërkesë duke iu adresuar ministrit që, faturën e pagave të muajit dhjetor t'i paguajnë ata. Në anën tjetër, ministri ka të drejtë ta bëjë transferin e mjeteve me vendim të tij. Sa i përket pyetjes së Defrimit, të them të drejtën ka edhe plot komuna të tjera, të cilat kanë vështirësi shumë më të mëdha se komuna jonë.

Kryetari: E falënderoj drejtorin e Financave. Bëhet fjalë për një koordinim të mirë me thesari dhe me departamentin për buxhet. Ne po e bëjmë një veprim, që nëse e kemi të munguar, rreziqet janë më të mëdha. Përgjegjëse për paga për muajin dhjetor është qeveria e Republikës së Kosovës, përkatësisht Ministria e Financave. Sipas veprimeve ligjore, ne jemi mjaft të koordinuar me thesarin. Për kundër komunave tjera, komuna jonë është më pak e dëmtuar. Ne jemi duke e eliminuar suficitin, është e vërtetë ajo që e tha Hasani dhe me këtë veprim së paku për një muaj kemi mbulueshmëri, si dhe në anën tjetër urdhrat përmbarimore i kemi shtyer për tremujorin e vitit të ardhshëm. Sipas ligjit me financat e pushtetit lokal dhe përgjegjësitë, komunat nuk kanë të drejtë të planifikojnë buxhet për kontratën kolektive dhe këtë problem duhet ta zgjidh vetëm qeveria e Republikës së Kosovës, pa marrë parasysh se cila parti është në qeveri. Ju ftoj ta votoni këtë pikë, sepse është veprimi më normal, më i dosmosdoshëm dhe më i mundshëm.

Kryesuesi: Faleminderit kryetar! Nëse nuk kemi diçka tjetër, e vendosim në votim pikën e fundit të rendit të ditës. Kush është për?... Kundër?... Konstatoj që me shumicë votash (24) aprovohet. Duhet iu falënderuar për vëmendjen, shihemi në mbledhjet e radhës.

Procesmbajtësi:

Albion Krasniqi



PROCESVERBAL